



Na osnovu člana 17. stav (1) i člana 44. stav (1) Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61b. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24 i 72/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu, tužitelj Sanin Bogunić, predsjednik Vijeća, sudac Velimir Ninković i sutkinja Sanela Gorušanović - Butigan, potpredsjednici Vijeća, tužiteljica Bojana Jolović, tužitelj Saša Sarajlić, sudija Obren Bužanin, sudija Sedin Idrizović, sutkinja Aleksandra Obradović, tužiteljica Željka Fabić, odvjetnica mr. Duška Bogojević, odvjetnica Elma Veledar Arifagić i prof. dr. Džamna Vranić, na sjednici održanoj 11. i 12.02.2026. godine, donijelo je:

RJEŠENJE

o imenovanju predsjednika Općinskog suda u Lukavcu

- I. Za predsjednika Općinskog suda u Lukavcu imenuje se **Fikret Mujkić**, na mandat od četiri (4) godine.
- II. Datum stupanja na dužnost imenovanog Vijeće će odrediti posebnom odlukom.

Obrazloženje

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na internet stranici dana 18.08.2025. godine objavilo javni konkurs pod brojem: 04-07-3-2618/2025, kojim je oglašena pozicija predsjednika Općinskog suda u Lukavcu.

Nakon provedene konkursne procedure, nadležno podvijeće je u skladu sa članom 61b. stav (2) Poslovnika VSTV-a BiH za predsjednika Općinskog suda u Lukavcu predložilo kandidate na rang listi pod rednim brojem 1 i 2, i to Fikreta Mujkića i Enisu Hankić, koji na sjednici Vijeća izlažu program rada koji su ranije dostavili i izložili komisiji za obavljanje razgovora.

U skladu sa članom 61b. stav (3), (4) i (5) Poslovnika VSTV-a BiH, nadležno podvijeće je dostavilo Vijeću obrazložene prijedloge za oba navedena kandidata, sa bodovima koje su kandidati ostvarili u konkursnoj proceduri i njihovim programom rada, te rang listu kandidata.

Nakon izlaganja prijedloga podvijeća, predloženi kandidati su na sjednici Vijeća, u skladu sa članom 61b. stav (6) i (7) Poslovnika VSTV-a BiH, izložili svoj program rada, prema redoslijedu koji su ostvarili na rang listi.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovnikom VSTV-a BiH, te na osnovu uspjeha postignutog u konkursnoj proceduri i izlaganja programa rada, Vijeće je primjenjujući odredbe člana 61b. stav (8), (9) i (10) Poslovnika VSTV-a BiH, odlučilo da za predsjednika Općinskog suda u Lukavcu imenuje prvorangiranog kandidata Fikreta Mujkića, koji od 01.03.2016. godine obavlja dužnost sudije Općinskog suda u Lukavcu.

Prethodno imenovanju na navedenu dužnost sudije Općinskog suda u Lukavcu, imenovani kandidat je od 2006. g. do 2016. g. obavljao dužnost sudije Osnovnog suda u Zvorniku, a u periodu od 2002. g. do 2006. g. dužnost sudije i predsjednika Općinskog suda za prekršaje Čelić. U periodu od 2001. g. do 2002. g. obavljao je funkciju izvršnog direktora za pravne poslove u „Šume Tuzlanskog kantona“ d.d. Tuzla, u periodu od 1998. g. do 2001. g. poslove kantonalnog pravobranioca u Kantonalnom pravobranilaštvu Tuzlanskog kantona, u periodu od 13.01.1998. g. do 31.01.1998. g. dužnost sudije Općinskog suda u Tuzli, u periodu od 1994. g. do 1998. g. dužnost sudije Općinskog suda za prekršaje Tuzla, a u periodu od 1982. g. do 1994. g. poslove pravника u KHK Kombinat d.d. Lukavac.

Vijeće je ocijenilo da imenovani kandidat u potpunosti ispunjava uslove za imenovanje propisane u članu 43. Zakona o VSTV-u BiH.

Kada je u pitanju broj ostvarenih bodova, Vijeće je imalo u vidu da je imenovani kandidat u toku konkursne procedure, u pogledu bodova za kriterij stručnosti i sposobnosti pravne analize ostvario ukupno 100 bodova od mogućih 100 bodova, dok je na razgovoru pred nadležnom komisijom Vijeća u pogledu drugih kriterija ostvario ukupno 26,9 boda od mogućih 30 bodova, što ga je u konačnici rangiralo na prvo mjesto rang liste kandidata sa ukupno ostvarenih 126,9 bodova od mogućih 130 bodova.

Kriteriji stručnosti i sposobnosti pravne analize imenovanog kandidata, koji je nosilac pravosudne funkcije, utvrđeni su na osnovu ocjene rada za posljednje tri godine za koje je ocijenjen, i to za 2022., 2023. i 2024. godinu, a računajući do dana isteka roka za podnošenje prijave po navedenom konkursu.

Na osnovu ocjena rada za navedene tri godine, odnosno ocjena 5, 5 i 5, utvrđeno je da je kandidat za navedene tri godine za koje je ocijenjen ostvario prosjek od 5. Prema odredbama člana 56. stav 2. Poslovnika VSTV-a BiH, njegovoj prosječnoj ocjeni rada za prethodne tri godine koja iznosi 5 dodijeljen je ekvivalentan broj bodova koji se koristi u konkursnoj proceduri od 100 bodova.

Ostali kriteriji, koji se odnose na sposobnost kandidata da odgovorno, nezavisno i nepristrasno obavlja funkciju za koju se prijavio, profesionalne nepristrasnosti i ugleda, te ponašanja van posla, dosadašnjeg radnog iskustva kandidata, edukacije i usavršavanja, objavljivanja stručnih i naučnih radova, te drugih aktivnosti u struci, komunikativnosti, rukovodnih vještina i iskustva, te sposobnosti upravljanja ljudskim potencijalima utvrđeni su na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u članu 54., 54b., 54d., 54e. i 54f. Poslovnika VSTV-a BiH, pri čemu je kandidat na osnovu toga u konačnici ostvario ukupno 26,9 bodova. Konačan broj bodova koje kandidat ostvari na razgovoru predstavlja prosjek zbira ocjena po kriterijima koji se ocjenjuju na razgovoru.

Pored ukupnog broja ostvarenih bodova, na osnovu kojih je kandidat u skladu sa članom 59a. stav (2) tačka a) Poslovnika VSTV-a BiH stekao uslove za predlaganje i imenovanje na poziciju predsjednika općinskog suda, Vijeće je vodilo računa o okolnostima koje su relevantne za procjenu podobnosti iz člana 48a. Poslovnika VSTV-a BiH, ocijenivši da ne postoje okolnosti koje izazivaju sumnju u pogledu podobnosti kandidata za poziciju za koju se prijavio.

Imenovanje navedenog kandidata, pored uspjeha postignutog u konkursnoj proceduri, opredjelio je i sveobuhvatan program rada Općinskog suda u Lukavcu za mandatni period koji je kandidat dostavio u toku konkursne procedure i izložio tokom obavljenog razgovora pred nadležnom komisijom Vijeća, kao i na sjednici Vijeća. Kroz izlaganje programa rada imenovani kandidat je iskazao visoke rukovodne i organizacione vještine i sposobnosti upravljanja ljudskim potencijalima.

Detaljno i uvjerljivo je obrazložio strateške ciljeve, te ciljne rezultate, te je predložio mjere za unapređenje efikasnosti i kvalitete suda. U potpunosti je prepoznao osnovne nedostatke suda u kojem radi, te je za to ponudio konkretna rješenja, pa je za očekivati da će uspješno odgovoriti svim zadacima i izazovima koji se postavljaju pred ovako značajnu rukovodnu poziciju.

Tokom svoje profesionalne karijere stekao je značajno rukovodno i pravno iskustvo na više odgovornih pozicija u pravosudnim i upravnim institucijama.

Uzimajući u obzir navedeno, Vijeće je ocijenilo da je imenovani kandidat u potpunosti ispunio zakonom propisane uslove, kao i druge kriterije koji se cijene prilikom izbora kandidata, kako bi bio imenovan na poziciju predsjednika Općinskog suda u Lukavcu.

Kandidat se na dužnost predsjednika suda, u skladu sa članom 28. stav (2) Zakona o VSTV-u BiH imenuje na mandat od 4 (četiri) godine.

U pogledu dijela rješenja o stupanju na dužnost imenovanog, isto se odgađa do okončanja dodatne provjere iz člana 86c. Zakona o VSTV-u BiH, a u vezi sa članom 19. stav (3) Pravilnika Visokog sudskog i tužilačkog vijeća Bosne i Hercegovine u vezi s izvještavanjem o imovini i interesima („Službeni glasnik BiH“ br. 20/24, 57/24 i 37/25), odnosno do okončanja upravnog spora ukoliko je pokrenut protiv rješenja o imenovanju.

Ovo rješenje će biti objavljeno na internet stranici Vijeća, u skladu sa članom 44. stav (1) Zakona i članom 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

Uputa o pravnom lijeku: Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-2-937-1/2026
Datum: 12.02.2026. godine



